



## SVAR VIÐ FYRIRSPURN

**Viðtakandi:** Skóla- og frístundaráð

**Sendandi:** Helgi Grímsson, sviðsstjóri skóla- og frístundasviðs

---

### **Svar við fyrirspurn áheyrnarfulltrúa Flokks fólksins í borgaráði um stöðu á biðlistum eftir leikskólaplássi**

Á fundi borgarráðs, 27. júlí 2023, var lögð fram svohljóðandi fyrirspurn áheyrnarfulltrúa Flokks fólksins:

*Fulltrúi Flokks fólksins óskar upplýsinga um hver staðan sé á biðlista eftir leikskólaplássi í Reykjavík. Eins og löngum er þekkt er sár skortur á leikskólaplássum en í vor biðu 911 börn á biðlista samkvæmt talningu, á sama tíma á síðasta ári biðu 800 börn. Núna er meðalaldur barna á biðlista 23 mánuðir, eftir plássi í borgarreknu skólana en var lengi 20 mánuðir. Vísað til meðferðar skóla- og frístundaráðs.*

#### **Svar:**

Þann 1. september 2023 voru samtals 658 börn 12 mánaða og eldri á biðlista eftir leikskólaplássi í borgarrekna leikskóla, þar af eru 98 börn 18 mánaða og eldri. Til viðbótar eru 67 börn að bíða eftir flutningi úr sjálfstætt starfandi leikskóla. Mörg elstu barnanna á biðlistanum hafa nýverið bæst við vegna flutninga til borgarinnar.

Aðlögun í bæði borgarrekna og sjálfstætt starfandi leikskóla er í fullum gangi. Börnin byrja í aðlögun eftir skipulagi, oft elstu börnin fyrst og svo eru börnin tekin inn eftir aldri og eftir því sem nýráðið starfsfólk hefur störf.

Börn sem eru að fara að hefja vistun í sjálfstætt starfandi leikskólum en eru á biðlista eftir borgarreknunum leikskólum detta ekki út af biðlistanum fyrr en vistun hefst í sjálfstætt starfandi leikskólunum. Ljóst er að talsverður hluti þessara 658 barna sem ekki eru í leikskóla í Reykjavík í dag eru með vilyrði fyrir leikskólaplássi í sjálfstætt starfandi leikskóla þó að vistun sé ekki hafin. Ekki er vitað að svo stöddu hver sá fjöldi er.

Áætla má að 80-150 reykvísk börn fái úthlutað plássi hjá sjálfstætt starfandi leikskólum á næstunni og á komandi vetri. Þá má gera ráð fyrir að flest þeirra 375 barna sem skráð voru í vistun hjá dagforeldrum þann 1. september 2023 séu á biðlista eftir leikskólaplássi.

Að þessu sögðu má áætla að um 200 börn af þeim 658 börnum 12 mánaða og eldri sem eru á biðlistanum séu ekki komin með vilyrði fyrir vistun eða séu í vistun í öðru sveitarfélagi. Taka má fram að fá skrá sig af biðlista um leið og þau flytja frá borginni en þau sem flytja til borgarinnar bætast hins vegar fljótt á biðlistann.